

## Rundskriv

---

Nr.  
Q - 7/2009

Vår ref  
200604939-/MOSS

Dato  
04.12.2008

### **Retningsliner for tilskot til samlivstiltak 2009**

#### **1. MÅLSETJINGA MED TILSKOTSORDNINGA**

Tilskot til samlivstiltak er løyvd over kap. 0841 på statsbudsjettet.

Den overordna målsettinga med tilskota er å stø opp om samlivet i parforhold. Midlane skal brukast til å styrke samlivsforhold med sikte på å skape gode relasjoner og førebyggje familie- og samlivsoppløysing. Tiltak som kan styrke samlivet kan vere viktige i eit samla førebyggjande familie- og samlivsarbeid. Ei viktig målsetjing er å skape ein trygg og stabil oppvekst for barna.

Tilskotsordninga er oppretta med sikte på eit breitt spekter av søkerar. Barne- og likestillingsdepartementet ynskjer å oppretthalde engasjementet hjå dei som arbeider på dette området. I ei tid med eit utvida familieomgrep og auka grad av ”nye” familie- og samlivsformer bør tilskotsordninga òg kunne nyttast til nye målgrupper og utvikling av nye metodar og tiltak for t.d. likekjønna par, framandkulturelle par, ekspartnerar med felles barn, m.v.

I marknadsføring og gjennomføring av alle type samlivskurs er det naudsynt å leggje særleg vekt på at kursa skal appellere til både menn og kvinner, og at begge kjønn skal ha nytte av kursa.

Midlane frå tilskotsordninga skal nyttast til to type tiltak:

- 1) lokale samlivskurs/samlingar for par, og
- 2) utviklingstiltak i samlivsarbeidet.

Tiltak som primært fell inn under andre statlege stønadsordningar, t.d. midlar til samlivsrettleiing til foreldre med funksjonshemma barn eller tilbod om gratis samlivskurs for fyrstegongs foreldre, vil ikkje verte prioriterte her.

Midla skal nyttast på ein høveleg og økonomisk fornuftig måte, slik at dei kjem flest mogleg brukarar til gode. Det er difor viktig at dei administrative utgiftene til kursa vert haldne på eit lågt nivå.

Regjeringa har bestemt å øyremerke delar av midlane i 2009 til tiltak for å fremje likestilling mellom foreldre, blant anna mannsretta tiltak, for eksempel kursopplegg for pappagrupper, og kompetanseoppbygging for meklarar.

## **2. LOKALE SAMLIVSTILTAK**

### 2.1 Nærare om målsetjing og innhald

Samlivskursa har eit førebyggjande siktemål, og skal ikkje ha karakter av behandling. Målsetjinga er å utvikle og halde vedlike eit godt samliv i parforhold, både for ektepar og sambuarar, og slik stø opp om ein varig og stabil familiesituasjon. Kursa må ta opp det ein kan kalle "vanlege" problem i parforhold. Tiltak retta mot meir alvorlege problem eller kriser vert ikkje støtta av ordninga. Dette høyrer inn under andre instansar, t.d. familievernkontor og krisesentra.

Vanlege tema på samlivskurs er kommunikasjon, samspel, konfliktløysing, korleis ein kan ta vare på og utvikle parforholdet, spørsmål kring samarbeid og arbeidsfordeling og andre sider ved samlivet.

Det er ei målsetjing at samlivskursa er av høg kvalitet, at dei vert haldne av kvalifiserte kursleiarar og at kursa vert tilpassa flest mogeleg brukargrupper.

### 2.2 Kven kan søkje

Frivillige organisasjoner og andre som har som målsetjing å stø opp om og styrke familie og parforhold, kan søkje om midlar til samlivskurs. "Frivillige organisasjoner" kan vera humanitære og religiøse organisasjoner, organisasjoner innan helse- og sosialsektoren, kyrkjelydar, o.a. Kommunar, familievernkontor og liknande institusjonar som vil ta opp samliv som tema kan søkje, gjerne i samarbeid med frivillige organisasjoner.

For å nytte ressursane best mogeleg og for å opprette nettverk i lokalmiljøet, vil søkerar som samarbeider lokalt verta prioriterte.

Det vert ikkje gjeve midlar til privatpersonar eller tiltak som er drivne på forretningsmessig basis.

### 2.3 Opplysningar i søknaden

Målsetjinga for kurset må gå klart fram av søknaden. Den må gje opplysningar om program og innhald, målgruppe, kursleiar/kurshaldar, tidspunkt og omfang. Planlagde kostnader må gå fram av eit eige budsjett. Søkerar som budsjetterer med eige midlar vil verte prioriterte.

### 2.4 Bruk av midlane og rapportering

Tilskotet kan brukast til å dekkje administrative utgifter som honorar, reise og opphaldsutgifter til kursleiarar, innkjøp av kursmateriell, annonsering og leige av lokale.

Midlane kan ikkje brukast til godtgjersle eller tilskot til kursdeltakarane sine utgifter til samlivskurs (reise, opphold, servering, gåver, utgifter til barnepass e.l.). Slike utgifter må dekkjast anten av søkeren/arrangøren eller av kursdeltakarane sjølve. Det er eit mål at deltakarane sin private økonomi ikkje skal utelukke mindre bemidla grupper frå å delta på kursa. Arrangøren skal difor velje kursstad som ikkje inneber store utgifter til reise og opphold, sidan dette er utgifter som tilskota ikkje dekker.

Nærare opplysningar om disponering av midlane og rapportering frå tiltaket vert gjeve i brev med melding om tildeling av tilskot. Med tanke på mogleg seinare evaluering eller forsking skal ein i rapporteringa leggje ved ei utgreiing om brukarane sin evaluering av tiltaket.

### **3. UTVIKLINGSTILTAK**

#### 3.1 Nærare om målsetjing og innhald

Målsetjinga med utviklingsarbeidet er å styrke den faglege kvaliteten på samlivskursa og auke kunnskapen om gode samlivstiltak. Dessutan vil det vere ønskjeleg å utvikle samlivstiltak retta mot andre grupper enn dei tradisjonelle målgruppene, jf pkt 1. Tiltak som tek sikte på å få til ei god organisering/spreiing av tilbodet, og som kan medverke til at samlivstiltak vert ein integrert og etablert del av det lokale førebyggjande familiearbeidet, vil verte prioriterte. Likeins vil utvikling av kurs til nye målgrupper, og utvikling av nye metodar og tiltak verte prioriterte, jf. pkt. 1. Prosjekta kan dreie seg om ulike sider av samlivsarbeidet, som t.d. skolering av kurshaldarar, utvikling av program/materiell for samlivskurs, organisering og samarbeid om samlivstiltak lokalt o.a.

I 2009 skal ein del av midlane øyremerkast for å fremje likestilling mellom foreldra. 2 mill. kroner øyremerkast til utvikling av kursmateriell til bruk i studiegrupper for fedrar med små barn (pappagrupper). Det skal utarbeidast kursmateriell for både kursleiarar og kursdeltakarar. Målgruppa er fedrar i samliv, og opplegget skal ha eit samlivsperspektiv. Vidare skal inntil 1 mill kroner gå til å styrke kompetansen om likestilling for meklarar.

#### 3.2 Kven kan sökje

Organisasjonar og institusjonar med kompetanse på samlivsarbeid og utviklingsarbeid kan sökje om midlar til utviklingsprosjekt.

#### 3.3 Opplysningar i söknaden, bruk av midlane og rapportering

Prosjektsøknader må gjere grundig greie for bakgrunnen for og målsetjinga med prosjektet, metoden, gjennomføringa og kva ein ventar som resultat. Søknaden må vidare innehalde budsjett og framdriftsplan for tiltaket. Krav til opplysningar i søknaden, og til bruken av midlane, er dei same som ved lokale kurstiltak (jf. 2.3 og 2.4).

Prosjekta må gje ny kunnskap/røynsle på samlivsfeltet. Resultata av utviklingsarbeidet må ha overføringsverdi, slik at dei kan medverka til fagleg og/eller organisatorisk utvikling av samlivsarbeidet. Ved prosjektslutt skal det lagast ein kort, skriftleg rapport om resultata.

Dei som sökjer om midlar til både lokale samlivskurs og til utviklingstiltak, må sende separate søknader til dei to formåla. Alle søknader sendast til Barne-, ungdoms- og familielidirektoratet (Bufdir.)

### **4. VEDTAK/KLAGE**

Bufdir sine vedtak etter pkt. 2 og 3 skjer etter ei heilskapleg og skjønsmessig vurdering. Vedtaket er eit enkeltvedtak etter forvaltningslova, og kan påklagast innan dei frister som følgjer av forvaltningslova (tre veker). Klaga sendast til Bufdir, som førebur klaga for Barne- og likestillingsdepartementet. Barne- og likestillingsdepartementet avgjer klaga.